

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

**Zaključak o odbacivanju Prijave koncentracije privrednog subjekta BS TS a.s, Češka  
Republika**

**Sarajevo  
juni, 2017. godine**



Broj: UP-05-26-1-010- 6 /17  
Sarajevo, 06.07.2017.godine

Na osnovu člana 25. stav (1) tačka e), člana 42. stav (2), a u vezi sa članovima 12. i 14. Zakona o konkurenciji ("Službeni glasnik BiH", br. 48/05, 76/07 i 80/09), a rješavajući po Prijavi koncentracije privrednog subjekta BS TS a.s, Mokra 1289/1a, Chodov, 149 00 Prag 4, Češka Republika, podnesenu putem opunomoćenika advokata Lejle Hadžić, Mula Mustafe Bašeskije 6, 71 000 Sarajevo, zaprimljenu dana 12.04.2017. godine pod brojem: UP-05-26-1-010-1/17, Konkurencijsko vijeće, na 5. (petoj) sjednici održanoj dana 06.07.2017. godine, donijelo je

### **ZAKLJUČAK**

1. Odbacuje se Prijava koncentracije privrednog subjekata BS TS a.s, Mokra 1289/1a, Chodov, 149 00 Prag 4, Češka Republika, radi nepostojanja koncentracije u smislu člana 12. stav (1) Zakona o konkurenciji.
2. Ovaj Zaključak bit će objavljen u „Službenom glasniku BiH“, službenim glasilima entiteta i Brčko Distrikta Bosne i Hercegovine.

### **Obrazloženje**

Konkurencijsko vijeće Bosne i Hercegovine je dana 12.04.2017. godine pod brojem: UP-05-26-1-010-1/17, od strane privrednog subjekta BS TS a.s, Mokra 1289/1a, Chodov, 149 00 Prag 4, Češka Republika (dalje u tekstu: BS TS a.s ili Podnosilac prijave), putem advokata Lejle Hadžić, Mula Mustafe Bašeskije 6, 71 000 Sarajevo zaprimilo Prijavu koncentracije, kojom privredni subjekat BS TS a.s, u smislu člana 12. stav (1) Zakona o konkurenciji ("Službeni glasnik BiH", br. 48/05, 76/07 i 80/09) (dalje u tekstu: Zakon), stiče većinski udio u privrednom subjektu BS Telecom Solutions d.o.o. Sarajevo, Društvo za inženjering, razvoj i usluge, Tvornička 3, Ilidža 71000 Sarajevo (u daljem tekstu: BS Telecom).

Podnosilac prijave je predmetnu prijavu dopunio podneskom broj: UP-05-26-1-010-3/17 od dana 28.04.2017. godine.

Po prijemu dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 07.06.2017. godine, pod brojem: UP-05-26-1-010-4/17.

Podnosilac prijave je u skladu s članom 30. stav (2) Zakona u istoj naveo da Prijavu nije podnio niti ima namjeru podnijeti ovlaštenim tijelima za ocjenu koncentracije izvan teritorije Bosne i Hercegovine.

Konkurencijsko vijeće u postupku ocjene dopuštenosti predmetne transakcije je utvrdilo slijedeće činjenice:

Prijava je podnesena u zakonom propisanom roku, u smislu člana 16. stav (1) Zakona.

## 1. Učesnici predmetne transakcije

Učesnici transakcije su privredni subjekt BS TS a.s, Mokra 1289/1a, Chodov, 149 00 Prag 4, Češka Republika i privredni subjekt BS Telecom Solutions d.o.o. Sarajevo, Društvo za inženjering, razvoj i usluge, Tvornička 3, Ilidža 71000 Sarajevo.

### 1.1. Privredni subjekat BS TS a.s

Privredni subjekat BS TS a.s, Mokra 1289/1a, Chodov, 149 00 Prag 4, Češka Republika, upisan je u privredni registar Mjesnog suda u Pragu dana 24.11.2016. godine pod identifikacionim brojem: (..)\*<sup>1</sup>.

Privredni subjekt BS TS a.s registrovan je kao dioničko društvo koje je u 100,0% vlasništvu fizičkog lica (..)\*, (..)\*, (..), Češka Republika.

Prema podacima iz Prijave, Podnosilac prijave djeluje na IKT tržištu, odnosno na tržištu informaciono-komunikacionih tehnologija.

### 1.2. Privredni subjekat BS Telecom

Privredni subjekat BS Telecom Solutions d.o.o. Sarajevo, Društvo za inženjering, razvoj i usluge, Tvornička 3, Ilidža 71000 Sarajevo upisan je u Registar Općinskog suda u Sarajevu pod brojem (..)\* (JIB broj: (..)\*), sa ugovorenim osnovnim kapitalom u iznosu od (..)\* KM, i u vlasništvu fizičkih lica kako slijedi:

1. (..)\*, 74.252,43 KM (90%)
2. (..)\*, 2.062,57 KM (2,5%)
3. (..)\*, 2.062,57 KM (2,5%)
4. (..)\*, 2.062,57 KM (2,5%)
5. (..)\*, 2.062,57 KM (2,5%).

Prema podacima iz Prijave privredni subjekt BS Telecom ima jedno povezano društvo i to: Biofarmed d.o.o. Sarajevo, Branilaca Sarajeva 20, 71 000 Sarajevo čiji je osnivač i 100% vlasnik također fizičko lice (..)\*.

Osnovna registrovana djelatnost privrednog subjekta BS Telecom jeste računarsko programiranje

## 2. Pravni osnov predmetne transakcije

Kao pravni osnov ove transakcije Podnosilac prijave je dostavio „Ugovor o istupanju članova društva i prenosu udjela, prava i obaveza u privrednom društvu BS TS d.o.o. Sarajevo“ potpisanom dana 10.04.2017. godine od strane ovlaštenih lica privrednog subjekta BS Telecom Solutions d.o.o. Sarajevo, Društvo za inženjering, razvoj i usluge, Tvornička 3, Ilidža 71000 Sarajevo, odnosno fizičkih lica (..)\* s jedne strane (Prenositelji udjela) i privrednog subjekta BS TS a.s, Mokra 1289/1a, Chodov, 149 00 Prag 4, Češka Republika, zastupano od strane statutarnog direktora (..)\* (Sticatelj udjela).

Ugovorom je definisano da iz Društva (privredni subjekt BS Telecom) istupe Prenositelji udjela i izvrše prenos svojih cjelokupnih udjela na Sticatelja udjela uz naknadu i troškove definisane Ugovorom.

---

<sup>1</sup> (..)\* - podaci predstavljaju poslovnu tajnu

Slijedom navedenog, prenos udjela Prenositelja na Sticatelja udjela ima za posljedicu promjenu vlasničke strukture u Društvu i na osnovu Ugovora privredni subjekat BS TS a.s stiće 100,0% udjela u privrednom subjektu BS Telecom.

### **3. Ocjena predmetne transakcije**

Članom 12. stav (1) Zakona o konkurenciji propisano je da se pod pojmom koncentracije smatra:

- a) spajanje ili pripajanje nezavisnih privrednih subjekata ili dijelova privrednih subjekata;
- b) stjecanje kontrole ili prevladajućeg utjecaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata;
- c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekat.

Analizom dostavljenih podataka i dokumentacije utvrđeno je da su privredni subjekti BS TS a.s i BS Telecom u većinskom vlasništvu fizičkog lica (..)\*<sup>2</sup>, odnosno da nisu nezavisni privredni subjekti, i prema tome navedena transakcija ne predstavlja koncentraciju u smislu člana 12. Zakona o konkurenciji, jer neće doći do sticanja kontrole ili dominantnog uticaja privrednog subjekta BS TS a.s nad privrednim subjektom BS Telecom, obzirom da je fizičko lice (..)\* od ranije vlasnik 90,0% dionica osnovnog kapitala u privrednom subjektu BS Telecom, dok je istovremeno i 100,0% vlasnik dioničkog društva BS TS a.s.

Na osnovu navedenog, privredni subjekt BS TS a.s nije bio u obavezi podnijeti Prijavu koncentracije, te je Konkurencijsko vijeće odlučilo kao u dispozitivu ovog Zaključka.

### **4. Administrativna taksa**

Podnosilac Prijave na ovaj zaključak, u skladu sa članom 2. Tarifni broj 108. Tačka c) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

### **5. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednik**

**Ivo Jerkić**

---

<sup>2</sup> (..)\* - podaci predstavljaju poslovnu tajnu